

一

微月生西海，幽阳始代升。  
圆光正东满，阴魄已朝凝。  
太极生天地，三元更废兴。  
至精谅斯在，三五谁能征。

二

兰若生春夏，芊蔚何青青。  
幽独空林色，朱蕤冒紫茎。  
迟迟白日晚，袅袅秋风生。  
岁华尽摇落，芳意竟何成。

三

苍苍丁零塞，今古缅荒途。  
亭堠何摧兀，暴骨无全躯。  
黄沙幕南起，白日隐西隅。  
汉甲三十万，曾以事匈奴。  
但见沙场死，谁怜塞上孤。

四

乐羊为魏将，食子殉军功。

骨肉且相薄，他人安得忠。

吾闻中山相，乃属放麇翁。

孤兽犹不忍，况以奉君终。

## 五

市人矜巧智，于道若童蒙。

倾夺相夸侈，不知身所终。

曷见玄真子，观世玉壶中。

窅然遗天地，乘化入无穷。

## 六

吾观龙变化，乃知至阳精。

石林何冥密，幽洞无留行。

古之得仙道，信与元化并。

玄感非象识，谁能测沈冥。

世人拘目见，酣酒笑丹经。

昆仑有瑶树，安得采其英。

## 七

白日每不归，青阳时暮矣。

茫茫吾何思，林卧观无始。

众芳委时晦，□鵙鸣悲耳。

鸿荒古已颓，谁识巢居子。

## 八

吾观昆仑化，日月沦洞冥。

精魄相交会，天壤以罗生。

仲尼推太极，老聃贵窈冥。

西方金仙子，崇义乃无明。

空色皆寂灭，缘业定何成。

名教信纷藉，死生俱未停。

## 九

圣人秘元命，惧世乱其真。

如何嵩公辈，诌譎误时人。

先天诚为美，阶乱祸谁因。

长城备胡寇，嬴祸发其亲。

赤精既迷汉，子年何救秦。

去去桃李花，多言死如麻。

## 十

深居观元化，怫然争朵颐。

谗说相啖食，利害纷嶷嶷。

便便夸毗子，荣耀更相持。

务光让天下，商贾竞刀锥。

已矣行采芝，万世同一时。

## 十一

吾爱鬼谷子，青谿无垢氛。

囊括经世道，遗身在白云。

七雄方龙鬪，天下久无君。

浮荣不足贵，遵养晦时文。

舒可弥宇宙，卷之不盈分。

岂徒山木寿，空与麋鹿群。

## 十二

呦呦南山鹿，罹罟以媒和。

招摇青桂树，幽蠹亦成科。

世情甘近习，荣耀纷如何。

怨憎未相复，亲爱生祸罗。

瑶台倾巧笑，玉杯殒双蛾。

谁见枯城蘖，青青成斧柯。

### 十三

林居病时久，水木澹孤清。

闲卧观物化，悠悠念无生。

青春始萌达，朱火已满盈。

徂落方自此，感叹何时平。

### 十四

临岐泣世道，天命良悠悠。

昔日殷王子，玉马遂朝周。

宝鼎沦伊谷，瑶台成古丘。

西山伤遗老，东陵有故侯。

### 十五

贵人难得意，赏爱在须臾。

莫以心如玉，探他明月珠。

昔称夭桃子，今为春市徒。

鸱鸢悲东国，麋鹿泣姑苏。

谁见鸱夷子，扁舟去五湖。

### 十六

圣人去已久，公道缅良难。  
蚩蚩夸毗子，尧禹以为谩。  
骄荣贵工巧，势利迭相干。  
燕王尊乐毅，分国愿同欢。  
鲁连让齐爵，遗组去邯郸。  
伊人信往矣，感激为谁叹。

## 十七

幽居观天运，悠悠念群生。  
终古代兴没，豪圣莫能争。  
三季沦周赧，七雄灭秦嬴。  
复闻赤精子，提剑入咸京。  
炎光既无象，晋虏复纵横。  
尧禹道已昧，昏虐势方行。  
岂无当世雄，天道与胡兵。  
咄咄安可言，时醉而未醒。  
仲尼溺东鲁，伯阳遁西溟。  
大运自古来，旅人胡叹哉。

## 十八

逶迤势已久，骨鯁道斯穷。

岂无感激者，时俗颓此风。

灌园何其鄙，皎皎于陵中。

世道不相容，嗟嗟张长公。

## 十九

圣人不利己，忧济在元元。

黄屋非尧意，瑶台安可论。

吾闻西方化，清净道弥敦。

奈何穷金玉，雕刻以为尊。

云构山林尽，瑶图珠翠烦。

鬼工尚未可，人力安能存。

夸愚适增累，矜智道逾昏。

## 二十

玄天幽且默，群议曷嗻嗻。

圣人教犹在，世运久陵夷。

一绳将何系？忧醉不能持。

去去行采芝，勿为尘所欺。

## 二十一

蜻蛉游天地，与世本无患。  
飞飞未能止，黄雀来相干。  
穰侯富秦宠，金石比交欢。  
出入咸阳里，诸侯莫敢言。  
宁知山东客，激怒秦王肝。  
布衣取丞相，千载为辛酸。

## 二十二

微霜知岁晏，斧柯始青青。  
况乃金天夕，浩露沾群英。  
登山望宇宙，白日已西暝。  
云海方荡潏，孤鳞安得宁。

## 二十三

翡翠巢南海，雄雌珠树林。  
何知美人意，骄爱比黄金。  
杀身炎州里，委羽玉堂阴。  
旖旎光首饰，葳蕤烂锦衾。  
岂不在遐远，虞罗忽见寻。  
多材信为累，叹息此珍禽。



## 二十四

挈瓶者谁子，皎服当青春。

三五明月满，盈盈不自珍。

高堂委金玉，微缕悬千钧。

如何负公鼎，被讪笑时人。

## 二十五

玄蝉号白露，兹岁已蹉跎。

群物从大化，孤英将奈何？

瑶台有青鸟，远食玉山禾。

昆仑见玄凤，岂复虞云罗。

## 二十六

荒哉穆天子，好与白云期。

宫女多怨旷，层城闭蛾眉。

日耽瑶池乐，岂伤桃李时。

青苔空萎绝，白发生罗帷。

## 二十七

朝发宜都渚，浩然思故乡。

故乡不可见，路隔巫山阳。

巫山彩云没，高丘正微茫。  
伫立望已久，涕落沾衣裳。  
岂兹越乡感，忆昔楚襄王。  
朝云无处所，荆国亦沦亡。

## 二十八

昔日章华宴，荆王乐荒淫。  
霓旌翠羽盖，射兕云梦林。  
謁来高唐观，怅望云阳岑。  
雄图今何在？黄雀空哀吟。

## 二十九

丁亥岁云暮，西山事甲兵。  
赢粮匝邛道，荷戟争羌城。  
严冬阴风劲，穷岫泄云生。  
昏噎无昼夜，羽檄复相惊。  
拳跼竞万仞，崩危走九冥。  
籍籍峰壑里，哀哀冰雪行。  
圣人御宇宙，闻道泰阶平。  
肉食谋何失，藜藿纵横。

### 三十

可怜瑶台树，灼灼佳人姿。  
碧华映朱实，攀折青春时。  
岂不盛光宠，荣君白玉墀。  
但恨红芳歇，凋伤感所思。

### 三十一

竭来豪游子，势利祸之门。  
如何兰膏叹，感激自生冤。  
众趋明所避，时弃道犹存。  
云渊既已失，罗网与谁论。  
箕山有高节，湘水有清源。  
唯应白鸥鸟，可为洗心言。

### 三十二

索居犹几日，炎夏忽然衰。  
阳彩皆阴翳，亲友尽睽违。  
登山望不见，涕泣久涟洏。  
宿梦感颜色，若与白云期。  
马上骄豪子，驱逐正蚩蚩。

蜀山与楚水，携手在何时？

### 三十三

金鼎合神丹，世人将见欺。  
飞飞骑羊子，胡乃在峨眉。  
变化固幽类，芳菲能几时。  
疲痾苦沦世，忧瘁日侵淄。  
眷然顾幽褐，白云空涕洟。

### 三十四

朔风吹海树，萧条边已秋。  
亭上谁家子，哀哀明月楼。  
自言幽燕客，结发事远游。  
赤丸杀公吏，白刃报私仇。  
避仇至海上，被役此边州。  
故乡三千里，辽水复悠悠。  
每愤胡兵入，常为汉国羞。  
何知七十战，白首未封侯。

### 三十五

本为贵公子，平生实爱才。

感时思报国，拔剑起蒿莱。

西驰丁零塞，北上单于台。

登山见千里，怀古心悠哉。

谁言未忘祸，磨灭成尘埃。

### 三十六

浩然坐何慕，吾蜀有峨眉。

念与楚狂子，悠悠白云期。

时哉悲不会，涕泣久涟洏。

梦登绥山穴，南采巫山芝。

探元观群化，遗世从云螭。

婉变时永矣，感悟不见之。

### 三十七

朝入云中郡，北望单于台。

胡秦何密迩，沙朔气雄哉。

藉藉天骄子，猖狂已复来。

塞垣无名将，亭堠空崔嵬。

咄嗟吾何叹，边人涂草莱。

### 三十八

仲尼探元化，幽鸿顺阳和。

大运自盈缩，春秋递来过。

盲飙忽号怒，万物相纷靡。

溟海皆震荡，孤凤其如何。